



## SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka („Službeni glasnik BiH“, broj 95/12 i 41/16), člana 25. Pravilnika o godišnjim finansijskim izvještajima političkih stranaka („Službeni glasnik BiH“ broj 96/13 i i 89/16) i člana 12. Pravilnika o administrativnim procedurama pregleda, kontrole i revizije finansijskih izvještaja političkih stranaka („Službeni glasnik BiH“ broj 103/08), izdajem

### IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2016. GODINU STRANKE PENZIONERA-UMIROVLJENIKA BOSNE I HERCEGOVINE

Broj: 03-07-6-656/17  
Sarajevo, 21.08.2018. godine

## SADRŽAJ

MIŠLJENJE REVIZORA .....	3
1. UVOD .....	4
2. PREDSTAVLJANJE POLITIČKE STRANKE .....	4
3. OPIS PREGLEDA I KONTROLE FINANSIJSKOG IZVJEŠTAJA .....	5
Predmet pregleda i kontrole.....	5
Cilj pregleda i kontrole .....	5
Obim pregleda i kontrole.....	5
4. PRETHODNE KONTROLE I REVIZIJE .....	5
5. NALAZI I PREPORUKE .....	5
5.1. NALAZI.....	5
5.2. PREPORUKE .....	9

## **MIŠLJENJE REVIZORA**

Služba za reviziju finansiranja političkih stranaka izvršila je pregled godišnjeg finansijskog izvještaja Stranke penzionera-umirovljenika Bosne i Hercegovine za 2016. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Lokalnih izbora, održanih u oktobru 2016. godine.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka i odredbama poglavlja 15 Izbornog zakona Bosne i Hercegovine, te uspostavljanje efikasnog sistema internih kontrola.

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskog izvještaja, pa prema tome ne obezbjeđuju pouzdanost koja bi se dobila izvršenom revizijom u prostorijama stranke.

**Pregledom godišnjeg finansijskog izvještaja za 2016. godinu, utvrđeno je da je Stranka penzionera-umirovljenika Bosne i Hercegovine prekršila odredbe člana 4. stav (1), člana 6. stav (2), člana 8. stav (1) i stav (4), člana 11. i člana 12. stav (1) i stav (4) Zakona o finansiranju političkih stranaka.**

**Pregledom, odnosno kontrolom finansijskih izvještaja, osim gornjih napomena nismo zapazili ništa značajno, što bi ukazalo na nedostatke u finansijskom izvještaju ili na finansiranje ove političke stranke suprotno odredbama Zakona o finansiranju političkih stranaka, niti na finansiranje troškova izborne kampanje suprotno odredbama člana 15.10 Izbornog zakona Bosne i Hercegovine.**

## 1. UVOD

Služba za reviziju finansiranja političkih stranaka (u daljem tekstu: Služba za reviziju) izvršila je pregled godišnjeg finansijskog izvještaja Stranke penzionera-umirovljenika Bosne i Hercegovine za 2016. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Lokalnih izbora, održanih u oktobru 2016. godine.

Pregled i kontrola finansijskog izvještaja su provedeni u skladu sa članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da nije obavljena revizija u prostorijama političke stranke, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja Stranka penzionera-umirovljenika Bosne i Hercegovine se finansirala iz sljedećih izvora:

R/B	Izvori finansiranja	Iznos (KM)	Struktura (%)
1.	Članarina	86.079,15	58,20
2.	Prilozi fizičkih lica ( 3-a )	1.929,75	1,30
3.	Prilozi pravnih lica ( 3-b )	3.517,00	2,37
4.	Prihodi od imovine ( 3-c )	9,06	0,05
5.	Prihodi od dobiti preduzeća u vlasništvu političke stranke ( 3-d )	0,00	0,00
6.	Prihodi od poklona ( 3-e )	2.150,00	1,44
7.	Prihodi iz budžeta ( 3-f )	54.205,36	36,64
8.	Prihodi od propagande ( 3-g )	0,00	0,00
<b>I</b>	<b>Ukupni prihodi (1-8)</b>	<b>147.890,32</b>	<b>100,00</b>
<b>II</b>	<b>Ostali prihodi i drugo</b>	<b>0,00</b>	<b>0,00</b>
	<b>Izvori finansiranja (I+II)</b>	<b>147.890,32</b>	<b>100,00</b>

U godišnjem finansijskom izvještaju stranka je iskazala rashode u ukupnom iznosu od 175.245,15 KM.

## 2. PREDSTAVLJANJE POLITIČKE STRANKE

Naziv političke stranke je Stranka penzionera-umirovljenika Bosne i Hercegovine. Skraćeni naziv stranke je SP-U BiH.

Stranka penzionera-umirovljenika Bosne i Hercegovine je registrovana kod Općinskog suda u Sarajevu, rješenjem broj: R-I-4/02 od 23.04.2002. godine.

Sjedište stanke je u Sarajevu, Azize Šaćirbegović 2.

Lice ovlašteno za zastupanje Stranke penzionera-umirovljenika Bosne i Hercegovine je Sonja Akšamija, predsjednik stranke.

Lice ovlašteno za podnošenje finansijskih izvještaja za 2016. godinu je Azijada Lagumdžija.

Prema podacima iz godišnjeg finansijskog izvještaja za 2016. godinu, Stranka penzionera-umirovljenika Bosne i Hercegovine ima sljedeću organizacionu strukturu:

- SP-U BiH,
- 3 kantonalna odbora i
- 44 općinska odbora.

### **3. OPIS PREGLEDA I KONTROLE FINANSIJSKOG IZVJEŠTAJA**

**Predmet pregleda i kontrole** je godišnji finansijski izvještaj Stranke penzionera-umirovljenika Bosne i Hercegovine za 2016. godinu i finansijski izvještaj za period od dana podnošenja prijave za ovjeru za izbore do dana ovjere rezultata Lokalnih izbora, održanih u oktobru 2016. godine.

**Cilj pregleda i kontrole** je da revizor na bazi finansijskog izvještaja pokuša da ustanovi da li je politička stranka u izvještajnom periodu postupala u skladu sa odredbama Zakona o finansiranju političkih stranaka i odredbama člana 15.10 Izbornog zakona BiH. Ukoliko revizor na bazi kontrole finansijskog izvještaja utvrdi određena kršenja navedenih zakona, ocjenjuje da li je potrebno izvršiti reviziju u prostorijama stranke da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka, te da li je ostvarila troškove izborne kampanje u okviru zakonom utvrđenog limita.

**Obim pregleda i kontrole** finansijskih izvještaja Stranke penzionera-umirovljenika Bosne i Hercegovine obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava, sa posebnim naglaskom na prihode iz budžeta.

### **4. PRETHODNE KONTROLE I REVIZIJE**

Služba za reviziju je izvršila pregled finansijskih izvještaja Stranke penzionera-umirovljenika Bosne i Hercegovine u periodu od 2005.- 2015. godine, nakon kojih su izdati izvještaji o pregledu i reviziji sa mišljenjem revizora, nalazima i preporukama revizije.

Nakon izvršenog pregleda finansijskog izvještaja za 2015. godinu, izdat je izvještaj o pregledu sa mišljenjem revizora, nalazima i preporukama stranci da se, u skladu sa članom 6. stav (2) Zakona, dobrovoljni prilozi u novcu uplaćuju na transakcijski račun centrale političke stranke, da ne prima donacije koje su zakonom zabranjene, da poslovne knjige vodi u skladu sa računovodstvenim propisima, odnosno da vodi potpune i tačne evidencije o prihodima, rashodima i obavezama, da finansijske izvještaje koje podnosi Centralnoj izbornoj komisiji Bosne i Hercegovine popunjava u skladu sa Pravilnikom o godišnjim finansijskim izvještajima političkih stranaka i da poštuje i druge propise, prevashodno poreske iz kojih proističu dodatni troškovi i obaveze.

#### **Nerealizovane preporuke:**

Na osnovu uočenih nedostataka u godišnjem finansijskom izvještaju za 2016. godinu, utvrđeno je da Stranka penzionera-umirovljenika Bosne i Hercegovine nije ispoštovala date preporuke.

### **5. NALAZI I PREPORUKE**

#### **5.1. NALAZI**

##### **a) Stranka penzionera-umirovljenika Bosne i Hercegovine je prekršila odredbe člana 4. stav (1) Zakona o finansiranju političkih stranaka<sup>1</sup>.**

Stranka je dostavila Program utroška sredstava za 2016. godinu u kojem je predvidjela ukupne troškove u iznosu od 162.600,00 KM.

Uvidom u finansijski izvještaj stranke i dokumentaciju utvrđeno je da je stranka u 2016. godini ostvarila ukupne rashode u iznosu od 175.245,15 KM i time utrošila sredstva mimo utvrđenog programa u iznosu od 12.645,15 KM.

---

<sup>1</sup> U skladu sa odredbom člana 4. stav (1) Zakona o finansiranju političkih stranaka, stranka finansijska sredstva iz člana 3. stav (1) ovog zakona može koristiti isključivo za ostvarivanje ciljeva utvrđenih svojim programom i statutom.

Takođe, analizom je utvrđeno da je stranka planirala troškove za predizborne i izborne aktivnosti u iznosu od 20.000,00 KM, dok su troškovi propagande za Lokalne izbore 2016. godine iznosili 33.928,93 KM.

S obzirom da stranka programom utroška sredstava za 2016. godinu nije adekvatno predvidjela svoje troškove, te da je utrošila sredstva mimo planiranih, prekršila je odredbe člana 4. stav (1) Zakona o finansiranju političkih stranaka.

**b) Stranka penzionera-umirovljenika Bosne i Hercegovine prekršila je odredbe člana 6. stav (2) Zakona o finansiranju političkih stranaka.**

Pregledom finansijskih izvještaja utvrđeno je da prilozi fizičkih lica u iznosu od 1.929,75 KM nisu uplaćeni na transakcijski račun centrale stranke, čime su prekršene odredbe člana 6. stav (2) Zakona o finansiranju političkih stranaka.

**c) Pregledom godišnjeg finansijskog izvještaja za 2016. godinu, utvrđeno je da je Stranka penzionera-umirovljenika Bosne i Hercegovine prekršila odredbe člana 8. stav (1) i stav (4) Zakona o finansiranju političkih stranaka.**

(1) Stranka penzionera-umirovljenika Bosne i Hercegovine je u 2016. godini je primila prilog Udruženja penzionera Jablanica u iznosu od 300,00 KM.

Na osnovu podataka koje je dostavila Općina Jablanica, utvrđeno je da se Udruženje penzionera Jablanica finansiralo javnim sredstvima.

S obzirom da je Stranka penzionera-umirovljenika Bosne i Hercegovine primila prilog Udruženja koje se finansiralo javnim sredstvima, prekršila je odredbe člana 8. stav (1) tačka g) Zakona o finansiranju političkih stranaka.

(2) Pregledom godišnjeg finansijskog izvještaja za 2016. godinu utvrđeno je da je Stranka penzionera-umirovljenika primila priloge pravnih lica „Elektrofak“ doo Jablanica u iznosu od 100,00 KM i „Clima-trade“ doo Sarajevo u iznosu od 100,00 KM.

S obzirom da su navedena pravna lica u 2016. godini sklopila ugovore o javnim nabavkama roba, usluga i radova sa organima izvršne vlasti na svim nivoima u Bosni i Hercegovini čije su vrijednosti veće od 10.000,00 KM, Stranka penzionera-umirovljenika Bosne i Hercegovine je primila zabranjene priloge u ukupnom iznosu od 200,00 KM, čime je prekršila odredbe člana 8. stav (4) Zakona o finansiranju političkih stranaka.

– Prema podacima koje je dostavila Općina Jablanica, pravno lice „Elektrofak“ doo Jablanica je tokom 2016. godine imalo sklopljene ugovore o izvođenju radova, koji se odnose na proširenje javne rasvjete, uređenje saobraćajnica do harema Jasen, uređenje puteva u MZ Mirke, rekonstrukciju Stare ceste i drugih puteva u MZ Jablanica II, rekonstrukciju primarne i sekundarne mreže za vodosnabdijevanje u naselju Glogošnica i nastavak unaprijeđenja infrastrukture u romskom naselju Šljunkara u općini Jablanica ukupne vrijednosti 242.179,48 KM.

– Prema podacima Centralne izborne komisije Bosne i Hercegovine, pravno lice „Clima Trade“ doo Sarajevo je tokom 2016. godine imalo sklopljen Ugovor o nabavci i isporuci opreme-klima sistema u vrijednosti od 38.324,52 KM.

**d) Politička stranka je prekršila odredbe člana 11. i člana 12. stav (1) i stav (4) Zakona o finansiranju političkih stranaka.**

Stranka penzionera-umirovljenika BiH nije vodila evidencije o prihodima, rashodima i obavezama, čime je prekršila odredbe člana 11. i člana 12. stav (1) Zakona o finansiranju političkih stranaka.

Uvidom u Završni račun za 2016. godinu utvrđeno je da je stranka Agenciji za finansijske, informatičke i posredničke usluge d.d Sarajevo podnijela izvještaj na nivou političke stranke. Pregledom dodatne finansijske dokumentacije, utvrđeno je da stranka nije vodila poslovne knjige za općinske odbore<sup>2</sup>, što je u suprotnosti sa Zakonom o računovodstvu i reviziji Federacije BiH. Finansijski izvještaj, koji je podnijela Centralnoj izbornoj komisiji BiH, stranka nije popunila u skladu sa članom 12. stav (4) ovog Zakona i Pravilnikom o godišnjim finansijskim izvještajima političkih stranaka—u daljem tekstu: Pravilnik.

- (1) Politička stranka u obrascu 2. finansijskog izvještaja (Pregled prometa svih transakcijskih računa političke stranke) nije prijavila transakcijski račun broj: 3387202298019631 otvoren kod UniCredit banke d.d., čime je prekršila odredbe člana 11. Pravilnika.

Uvidom u izvode sa transakcijskog računa broj: 3387202298019631 utvrđeno je da je stranka u 2016. godini ostvarila sljedeći promet po ovom računu: promet ulaza u iznosu od 830,75 KM i promet izlaza u iznosu od 830,75 KM. Račun je ugašen dana 10.11.2016. godine i nije evidentiran u poslovnim knjigama stranke.

- (2) Uvidom u poslovne knjige stranke, utvrđeno je da je stranka u svojim poslovnim knjigama evidentirala prihod od članarine u iznosu od 81.891,15 KM.

S obzirom da je stranka u godišnjem finansijskom izvještaju iskazala prihod od članarine u iznosu od 86.079,15 KM, razliku od 4.188,00 KM stranka nije evidentirala u svojim poslovnim knjigama.

- (3) Stranka penzionera-umirovljenika Bosne i Hercegovine u svojim poslovnim knjigama nije evidentirala nenovčane donacije u iznosu od 2.150,00 KM koje je primila od fizičkih lica po osnovu besplatnog korištenja poslovnih prostora za rad svojih odbora.

Uvidom u Izjave fizičkih lica utvrđeno je da je stranka za rad svojih općinskih odbora Bužim, Ilidža, Travnik, Gračanica, Visoko, Glamoč, Goražde, Donji Vakuf, Čelić, Jablanica, Gradačac, Srebrenik, Živinice, Vareš, Tešanj, Hadžići, Trnovo, Ilijaš, Lukavac, Žepče, Čapljina i Gradskog odbora Mostar koristila prostore u vlasništvu fizičkih lica, bez obaveze plaćanja zakupnine za korištenje prostora.

Stranka penzionera-umirovljenika Bosne i Hercegovine je korištenjem poslovnih prostora u vlasništvu fizičkih lica, bez plaćanja zakupnine, primila nenovčane donacije, koje je imala obavezu da evidentira u poslovnim knjigama za 2016. godinu.

- (4) Uvidom u dokumentaciju stranke i finansijski izvještaj utvrđeno je da je Centrala stranke iskazala trošak dnevnica i putnih troškova u iznosu od 2.084,70 KM.

S obzirom da je politička stranka isplatila sredstva fizičkim licima koja nisu zaposlena u stranci, te da navedene isplate imaju karakter ličnih primanja, stranka je u skladu sa poreznim propisima<sup>3</sup> bila obavezna obračunati porez i doprinose na iznos od 2.084,70 KM, te po tom osnovu iskazati trošak u poslovnim knjigama i finansijskom izvještaju koji je podnijela Centralnoj izbornoj komisiji BiH.

<sup>2</sup> Stranka je vodila poslovne knjige samo za Glavni odbor stranke.

<sup>3</sup> Zakon o porezu na dohodak ("Službene novine Federacije BiH", br. 10/08, 9/10, 44/11, 07/13 i 65/13) i Pravilnik o primjeni Zakona o porezu na dohodak ("Službene novine Federacije BiH", broj: 67/08, 4/10, 86/10, 10/11, 53/11, 20/12, 27/13, 71/13 i 90/13).

- Centrala i općinski odbori stranke Maglaj, Lukavac, Gradačac i Zenica su fizičkim licima u 2016. godini, putem blagajne, vršili isplate naknada za izvršene (različite) usluge u ukupnom iznosu od 830,00 KM. Ove isplate imaju karakter ličnih primanja. Stranka je na ovaj iznos imala obavezu obračunati porez i doprinose, te iskazati trošak po tom osnovu, zbog činjenice da fizička lica kojima su sredstva isplaćena nisu zaposlena u stranci.

Na isti način stranka je u OO SP-U BiH Zenica izvršila isplate fizičkom licu putem blagajne na ime troškova goriva u iznosu od 285,60 KM. Takođe, i ove isplate imaju karakter ličnih primanja na koje je stranka imala obavezu obračunati porez i doprinose, te iskazati trošak po tom osnovu.

Pored navedenog, uvidom u blagajničke isplatnice općinskih odbora stranke Maglaj, Lukavac, Gradačac i Zenica utvrđeno je da je stranka vršila isplatu naknada fizičkim licima za izvršene usluge bez ikakvog dokumenta (odluke, zahtjevi, izvještaji o urađenom poslu i sl), što je suprotno pravilima blagajničkog poslovanja.

- (5) U obrascu 4.1 (režijsko-administrativni i ostali troškovi) finansijskog izvještaja stranka nije iskazala troškove zakupa za OO SP-U BiH Centar Sarajevo u iznosu od 206,80 KM, dok je za OO SP-U BiH Stari Grad Sarajevo iskazala troškove zakupa u većem iznosu za 900,00 KM, čime je prekršila odredbe člana 22. Pravilnika.
- (6) Stranka je u obrascu 4.2 (Troškovi propagande) godišnjeg finansijskog izvještaja pogrešno iskazala, odnosno neosnovano uvećala troškove propagande za 785,00 KM, čime je prekršila odredbe člana 23. Pravilnika.

Uvidom u dokumentaciju utvrđeno je da je stranka u OO SP-U BiH Centar i OO SP-U BiH Bužim iskazala u okviru troškova propagande učešće u finansiranju troškova takse za izbore u ukupnom iznosu od 200,00 KM.

S obzirom na činjenicu da su navedeni odbori sredstva uplatili na račun Centrale stranke, odnosno da su učestvovali u finansiranju zajedničkog troška, navedene isplate ne predstavljaju uopšte trošak stranke.

Postupajući na ovaj način, stranka je neosnovano uvećala svoje rashode, čime je prekršila odredbe člana 21. stav (2) i stav (4)<sup>4</sup> i člana 23. Pravilnika.

- (7) Uvidom u račune vezane za kampanju koje je stranka dostavila utvrđeno je da je stranka kao trošak kampanje iskazala račun dobavljača „Radio Breza“ u iznosu od 585,00 KM, a koji se odnosi na paket čestitki za vjerske i državne praznike.

S obzirom da navedeni trošak ne predstavlja kampanju stranke isti se ne može smatrati troškovima kampanje. Stranka je ovaj trošak u iznosu od 585,00 KM imala obavezu iskazati u obrascu 4.1 finansijskog izvještaja.

- (8) Stranka penzionera-umirovljenika Bosne i Hercegovine nije u poslovnim knjigama i finansijskom izvještaju iskazala stvarne obaveze prema dobavljačima na dan 31.12.2016. godine, čime je prekršila odredbe člana 24. Pravilnika.

Uvidom u akt Grada Bihaća broj: 01-23-4-2927 od 12.04.2017. godine, utvrđeno je da obaveze stranke prema Gradu Bihać po osnovu zakupa iznose 775,49 KM. Stranka ove obaveze nije evidentirala i iskazala u godišnjem finansijskom izvještaju.

---

<sup>4</sup> Novčana sredstva koja jedan organizacioni dio prenosi drugom organizacionom dijelu unutar političke stranke ne smatra se rashodom iz stava (2) ovog člana i ne iskazuju se na Obrascu 4.



### **Troškovi izborne kampanje**

Prema odredbama člana 15.10 Izbornog zakona BiH, politička stranka za potrebe izborne kampanje ne smije potrošiti više od 0,30 odnosno 0,20 KM<sup>5</sup> po biraču u svakom izbornom krugu, prema broju birača koje je objavila Centralna izborna komisija BiH.

Prema podacima Centralne izborne komisije BiH, Stranka penzionera-umirovljenika Bosne i Hercegovine je u svrhu izborne kampanje mogla da potroši 340.433,65 KM.

Stranka penzionera-umirovljenika Bosne i Hercegovine je u godišnjem finansijskom izvještaju za 2016. godinu iskazala troškove propagande u iznosu od 33.928,93 KM.

### **5.2. PREPORUKE**

*Preporučuje se Stranci penzionera-umirovljenika Bosne i Hercegovine da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:*

- *da finansijska sredstva troši u skladu sa Programom utroška sredstava,*
- *da priloge fizičkih lica uplaćuje na transakcijski račun Centrale stranke,*
- *da se ne finansira iz izvora, koji su zabranjeni političkim strankama,*
- *da poštuje i druge propise, prevashodno porezne, iz kojih proističu dodatne obaveze i troškovi, koje politička stranka treba izmirivati i evidentirati u poslovnim knjigama i finansijskom izvještaju koji podnosi Centralnoj izbornoj komisiji BiH,*
- *da poslovne knjige vodi u skladu sa računovodstvenim propisima, odnosno da vodi potpune i tačne evidencije o prihodima, rashodima i obavezama i*
- *da finansijske izvještaje koje podnosi Centralnoj izbornoj komisiji BiH popunjava u skladu sa Pravilnikom o godišnjim finansijskim izvještajima političkih stranaka.*

### **KOMENTAR:**

Stranka penzionera-umirovljenika Bosne i Hercegovine nije se očitovala na nalaze revizije i mišljenje revizora dato u Preliminarnom izvještaju o pregledu godišnjeg finansijskog izvještaja za 2016. godinu.

Šef Odsjeka za revizijske poslove

Sanja Tošović

Revizor

Veliborka Kenjić

Šef Službe za reviziju

Mr.sc Hasida Gušić

---

<sup>5</sup> Član 15.10 stav 2. Izbornog zakona BiH propisuje da se maksimalno dozvoljeni iznos za finansiranje izborne kampanje izračunava tako što se broj glasača u svim izbornim jedinicama u kojima politički subjekt ima kandidatsku listu ili kandidata pomnoži sa: 30 feninga za načelnika opštine odnosno gradonačelnika i za članove skupštine opštine, članove Narodne skupštine RS i Predstavničkog doma Parlamenta Federacije BiH, članove Parlamentarne skupštine BiH, člana Predsjedništva BiH, i predsjednika i potpredsjednike RS, odnosno 20 feninga za izbore za članove kantonalnih skupština.